



Tir Yimiyim

www.tirymiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymiyim@gmail.com

TAPAK 8

Yangia anidakangma : f Tir Yimiyim

Instagram tirymiyim@aolima

YouTube tir yimiyim

TAPAK 7

Asean lenirtem senden nung Gen Min Aung Hlaing mejaoktsü

Taruba hopta EAM, S Jaishankar-i Israel semdangtsü



VOL. XIX NO. 9 (ADOK 9) DIMAPUR

AMUNGNÜ (SUNDAY) MONGPUTENI (OCTOBER) 17, 2021

₹ 5.00

COVID-19 Nagaland: 24 dak putet & 14 taneptsü angu

Kohima, October 16, 2021 (TYO): Nagaland nung Honibarnü nisung 24 dak COVID-19 putet aser parnok züingsema nisung ajak agi 31,571 kümogo.

"Tesüiba ghonda nisung 24 dak COVID-19 putet. Parnokji Dimapur nung 11, Kohima nung 9 aser Longleng o Mokochung nung anana (2) lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Kasa mapang nisung 14 dak COVID-19 putet. Parnokji Dimapur nung 9, Mokochung nung 3 aser Wokha nung 2 lir" ta paisa ashi.

Nisung 31,571 rongnungi 29,639 taneptsü nguogo aser ibaji 93.88% lir, ta paisa ashi.

Tang nisung 236 anepaludar

saka parnok 157 dakbo shirangba yimya kecha mali, ta Dr Kikon-isa ashi.

"Hokolbar tashi nung nisung 700,612 nem COVID-19 vaccine indang dose 11,34,053 agütsüogo" ta State Immunization Officer, Dr Ritu Thurr-ia ashi.

"Vaccine agirtemji frontline workers 60,945, healthcare workers 15,998, arishi küm 45 ser temapur 200,503 aser arishi küm 18 nungi 44 tsüingda alir 423,166 lir" ta paisa ashi.

"Vaccine agirtem rongnungi nisung 433,441-i dose anaprong agiogo. Parnokji frontline workers 47,701, healthcare workers 13,327, arishi küm 45 ser temapur 150,099 aser arishi küm 18 nungi 44 tsüingda alir 222,314 lir" ta Dr Thurr-isa metetdaksü.

Nüjiso atema rarartem tushia Mount Harriet nungi Mount Manipur melener

Imphal, October 16, 2021 (Agencies): Manipur nungi nüjiso atema rarartem nem tetushi agüja Centre sorkari Andaman and Nicobar Islands nung aliba Mount Harriet dang Mount Manipur ajatsü lemtetogo.

Centre sorkari Kalapani nung aliba Mount Harriet ta ajaba melena Mount Manipur ta melentsü.

Honibarnü Andaman and Nicobar Islands kübok Port Blair nung lokti sentong ka nung o jembidang Union Home Minister Amit Shah-i iba osang metetdaksü.

"Mount Harriet nung Manipur Maharaja Kulchandra Dhvaj Singh aser nisung 22 puoka ayu. Parnok nungtem nung aser parnok nem tetushi ahüja Mount Manipur ta melentsü" ta Amit Shah-i ashi.

Centre-isa Mount Manipur (Mount Harriet) nung Manipur sorkari nungshilung ka yangluba nung yariteptsü ta Shah-i metetdaksü.

Centre sorkari iba osang sangoktsüba atema pelar ta Manipur chief minister Biren Singh-ia metetdaksüogo.

"Ozü tasütait lenirtem nem tetushi tulu agütsüba atema PM Narendra Modi aser Amit Shah na dang kanga pelar" ta CM Biren-i ashi.

"Andaman Nicobar Island nung aliba Mt Manipur nung Manipur sorkari nungshilung tesem ka yangluba nung Centre-i yariteptsü. Andaman sorkar aser Manipur sorkar tsüingda lease agreement nung sign asütsü atema mapa inyakdar" ta Manipur CM-isa metetdaksü.

Kerala nung tzüinglu kanga arur; Nisung 6 asü

Thiruvananthapuram, October 16, 2021 (Agencies): Kerala nung tzüinglu kanga arua timtem agütsüba atema Honibarnü Chief Minister Pinarayi Vijayan-i senden ka ayonga menogo.

"Tensa kanga mejungi lir saka weather reports tesüsabuba osang angashia temolung anisüingzük. Asenoki iba dang nungi tensa tamajungba majurutsü" ta CM Pinarayi Vijayan-i metetdaksü.

Kerala nung October 18 nungi college tem lapoktsüba liasü saka tanü senden nung ibaji October 20 nungi ang lapoktsü thinenogo. Senden nungsa Sabarimala tekülem aini aoertem dang October 19 tashi mapusoi atatsü mepishitsü lemtet.

State sorkari tzüimetsüing agi kongshia aliba tesemtem nungi aliba nisungtem kümzüksü atema mapa tuluba tenzükogo.

Tzüinglu kanga aruba ajanga tzüimetsüing aser anentsüh lendong balala atalokdang nisung 6 tashi süogo aser aika samar bushir ta osang angazük.

India Meteorological Department (IMD)-i district 5-Pathanamthitta, Kottayam, Ernakulam, Idukki aser Thrissur nung 'red alert' sangoktsüba sülen ano parnok Palakkad district nunga 'red alert' sangoktsüogo.

IMD-isa Kerala kübok district tenet nung 'orange alert' aser ana nung 'yellow alert' agütsüogo.

Taruba ghonda 24 atema 'high alert' alitsü, ta Kerala CM Pinarayi Vijayan-isa ashi.

"Ayongküm aser tzüinokdang anasa alirtem kanga kümdangtsüla aser ketdangsurtemi ashiba ama inyaksüla. Ano anentsüh aluba tesemtem nung alirtem kanga kümdangtsüla" ta Chief Minister Vijayan-i Facebook nung metetdaksü.

DUDA ajanga nisung kar dang takar akümer: RPP

Dimapur, October 16, 2021 (TYO): Nagaland state sorkari Eastern Nagaland aser arrtsülen aliba tesemtem renlokdaoktsü atema asalentong kecha mali aser Department of Under Developed Areas (DUDA) ya nisung kar sen lenmang angutsü atema tetetba ama sayur, ta Rising People's Party (RPP)-i metetdaksü.

Centre sorkari eastern Nagaland aser international border aliba tesemtem dena tesem kar nung Underdeveloped Area Programme (UDAP) aser Border Area Development Programme (BADP) kübok senotsü aika agütsür sernung terenlok kecha mali ta RPP-i sangdong ka nung ashi.

"2011-12 nungi tenzük tang tashi nung iba scheme ana kübok sen crore aika alangba work-orders meyrjang aika onoki ket nung lir aser item kulikaketem ajanga sen timi mamshiba sayur" ta RPP-i ashi.

"Centre-i yokba senji yimi amshi asübo Eastern Nagaland ya tang tashi nungbo kanga renloker lila. Ajisüaka, mozü ki, school, sporting facilities aser gari lenmang yanglutsü atema yokba sen aika retaining walls, footsteps, culverts, helipads amala yangluba nunga endokogo" ta RPP-isa metetdaksüogo.

DUDA contractor temi meta talang pilar aliba tesemtem nung Rs. 4,75,000/- dang endoka guest house aika yangluba atema süngmanger. Külen, kulikaketem ajanga Northeast nung süngmok aser elaiichi teimba supply asüba Eastern Nagaland asütsüba zülua lir, ta parnokisa ashi.

Minister tem aser sorkar den tiyongtsü nung tashi amshirtem ajanga kasa contractor temi kümshia work-orders ngupet

angur aser parnok rostrums, guest houses, culverts, playgrounds, footsteps amala tanen makai yanglur, ta RPP-isa ashi.

Nagaland state sorkari Eastern Nagaland aser arrtsülen aliba tesemtem renlokdaoktsü atema asalentong kecha mali aser Department of Under Developed Areas (DUDA) ya nisung kar sen lenmang angutsü atema tetetba ama sayur, ta RPP-isa ashi.

Onok ket nung aliba Work-Orders indang osang j a n g j a n ü r t e m i risingpeoplesparty@gmail.com ajanga tongteptsü akok, ta parnokisa ashi.

DUDA nem küm shia sen lemzüksüba indang osang RPP-i yimjak nung metetdaksütsü. 2011-12 atema Rs. 49.65 Crores lemzüksü ta DUDA ajanga ashir aser iba indang funding/work pattern tsüinglangen agütsür, ta RPP-isa metetdaksü.

Sl. No.	Name of the firm	Number of Work-Orders allocated to the firm for 2011-12	Total amount sanctioned to the firm under UDAP and BADP in Rs.
1.	M/S R.K Construction	16	3,76,20,000
2.	M/S Jorlemp Enterprise	22	3,60,05,000
3.	M/S Mopa Enterprise	15	3,18,25,000
4.	M/S Haowong Thai & Sons	16	2,55,39,000
5.	M/S H. Khampong	16	2,04,25,000
6.	M/S BendangKejong	13	2,02,35,000
7.	M/S L. HaomangKonyak& sons	5	1,58,65,000
8.	M/S T. WangdunKonyak	4	1,46,30,000
9.	M/S Suryanath Singh	13	1,41,55,000
10.	M/S Kuyiyipu & Co.	16	1,40,90,000
11.	M/S CKL Construction	3	1,13,05,000
12.	M/S D. Yongnyak	6	99,70,900
13.	M/S Wangnao Construction	7	96,90,000
14.	M/S C. Levi and Co.	13	95,00,000
15.	M/S C. Akai Taolem	9	84,55,000
16.	M/S M. Akai Konyak	8	80,75,000
17.	M/S T. AkhumbaYim	3	79,80,000
18.	M/S Sammy Konyak	4	79,80,000
19.	M/S W. Bendang Chang	5	75,05,000
20.	M/S Y. YiangpongKonyak	3	75,05,000
21.	M/S D. MangneAilly	5	71,25,000
22.	M/S A. PongshiPhom	2	71,25,000
23.	M/S Casa Enterprise	3	70,30,000
24.	M/S P. Apong Chang	4	65,55,000
25.	M/S P. MantokPhom	6	61,65,000
26.	M/S Dennis Zeliang	7	47,50,000
27.	M/S M.K. Construction	4	42,75,000
28.	M/S Muru Construction Co.	3	42,75,000
29.	M/S Techno Builders	2	42,75,000
30.	M/S NgampaKonyak	2	38,00,000
31.	M/S T. Asu Construction	1	38,00,000
32.	M/S NtsenthungTungoe	3	33,25,000
33.	M/S P. HonpeKonyak& Sons	5	23,75,000
34.	M/S Mongzar Enterprise	2	19,00,000
35.	M/S Multi-builders	1	19,00,000
36.	M/S NokpenKonyak	1	19,00,000
37.	M/S C. Ongkhum& brothers	4	17,10,000
38.	Others	17	96,90,000
Grand total		270 Work-orders	40,03,39,900/-

Rahul Gandhi nem Congress president inyakdaksünür Sangküm Aug 21 aser Sep 20 tsüingda election agitsü

Guwahati/New Delhi, October 16, 2021 (Agencies): Rahul Gandhi nem All India Congress Committee (AICC) president inyakdaksütsü atema Congress lenirtem aser züingsemtemi sentong ka tenzükoka inyaker.

Rajasthan sorkar nung minister kati Bodbarnü Congress party interim president Sonia Gandhi den ajurutep aser la dang Rahul Gandhi tanaben president inyakdaksütsü mepishia liasü.

"Prime Minister Narendra Modi-i aniba Centre sorkar anema Rahul Gandhi lenisüba kübok mapa inyaka otettsü" ta Ramesh Meena-i ashi.

Sonia Gandhi-i parnok tebilembatem lemsateptsü mapang agütsü ta Meena-isa metetdaksü.

Tawa tu Chhattisgarh chief

minister Bhupesh Baghel-ia "Rahul Gandhi-i dang Congress party ketdangtsüa otettsü" ta shiogo.

"Tanü linük tensa nung ajemdaker Congress-i Rahul Gandhi lenisüba nungdaker aser party züingsemtemia ibaji aginür" ta Congress general secretary KC Venugopal-ia ashi.

Congress züingsemtem tsüingda 'Rahul Raga' campaign tenzükogo ta osang ka ajanga sangoktsü.

Lok Sabha elections nung Congress-i tamakok anguba sülen Rahul Gandhi-i president menden nungi anena laisü.

Iba sülen Congress Working Committee (CWC)-i jembishiniua arur Rahul Gandhi-i party president nungi anenba shidi agizük aser taoba president Sonia Gandhi-i interim president

inyaktsü atema shima liasü.

Külen, Honibar nungi Congress president Sonia Gandhi lenisüba kübok Congress Working Committee (CWC) senden menogo.

Tanü senden nung Rahul Gandhi-i party züingsemtem dang Congress President inyaktsü ahangba atema bilemdangtsü nangzük, ta osang ka ajanga ashi.

Congress unit aikati Rahul dang President inyaktsü atema bangzüngtepaka pai iba mapa inyaktsü memolungi aruogo.

Tanü ghonda 5 jungnüa CWC senden amenba sülen party general secretary (oganisation) KC Venugopal-i "sangküm August 21 aser September 20 tsüingda Congress president indang election agitsü" ta osang metetdaksü.

October 22 & 23 nung ANCSU mungdang alitsü



ANCSU ketdangsürtemi October 16, 2021 nü osangbener den jembiba mapang tangokba noksa ka yangi angur.

Kohima, Mongputeni/Oct. 16 (TYO): All Nagaland College Students' Union (ANCSU) pur küm ana nung khen agiba 20 buba lokti mungdang October 22-23, 2021 anogotem "Heralding Tomorrow" omen nung ajemdaker amungtsü renemba mapang lir.

ANCSU tir Vimeyiekho Vitso aser pa den külem ketdangpur temi ashiba agi, iba anogo ana mungdang ya Kohima Science College (Autonomous) Jotsoma ajanga college telungzük nung ayongzüksü.

COVID-19 tensa tajungba kumaka aser state sorkari tazüokba aser talenba balala salaaka, ANCSU tangatetba tajung nung aser tashidak nungi jenbua alitsü mechi ANCSU nung züngsema aliba college 40 nungi iba mungdang atema college shia nungi delegates timba agi pungo (5) tashi ang yoktsüla, ta pai ashi.

Iba tesem nung affiliate süa aliba college 40 nungi delegates 200 den ANCSU ketdangsür, tejenpur aser mungdang ayongba college nungi

volunteers ajak senteper 100 shi adenshi aser college indang auditorium ya mungdang ki ama alitsü, ta ashi.

College 40 nungya government college 15 dena lir aser Eastern Nagaland nungi college tem maden saka iba mungdang nung adentsü atema ANCSU-i Eastern Nagaland College Students' Union jaoktsü, ta ANCSU tiri ashi.

State sorkari renema aliba standard operating procedures (SOPs) ajunga amshia iba mungdang amungtsü, aser iba yongji anogo ajema kumdaktsü, ta pai ashi.

Iba mungdang takok ngua mungtettsü atema terenemshiba tulu lir, ta Vitso-i ashi.

Iba mungdang nungya session pezü alitsü aser October 22, 2021 nikongdang 4:00 ako nungi tenzüksü. Mungdang tenzükba sentong Nagaland College Principals Association (NCPA) tir, Dr Visakhonü Hibo-i moatsütsü, ta ashi.

October 23, 2021 anepdang 9:00 ako nungi tenzüka 'inaugural session' alitsü, kong Minister, Higher Education &

Tribal Affairs Temjen Imna Along tongti o jembir alitsü.

Anüngdang 1:00 ako sentong nung Joint CEO, State Disaster Management Authority, Johnny Ruangmei ya academic guest alitsü aser nikongdang 5:00 ako nungi aiba sentong nung Agriculture Production Commissioner Y Kikheto Sema ya mungdang shibangtsür alitsü.

Iba mungdang mapang 2021-2023 kümsük asoshi ketdangpur tasen shimtsü atema election agitsü, aser iba atema züngsem asem agi akumba election commission ka tentetogo. Election commission nungya Medo Chirhah ya commissioner asütsü, Lima Jamir aser Mughato Yephthomi na züngsem alitsü.

Election code of conduct ya taruba hopta tetenzüklen sangdongtsü aser election ya tentinü nikongdang 2:30 ako nungi 4:30 ako tashi agitsü, ta pai ashi.

Electoral college nungya affiliate süa aliba college 40 nungi full-fledged college 38 lir aser parnok 'voting rights' ana-na alitsü, ta ANCSU tira ashi.

JCBKK director aser chairmen tem telungjem senden ka agitsü

Kohima, Mongputeni/Oct. 16 (TYO): Japfüphiki Chokri Baptist Khriesarüü Krotho (JCBKK) indang Director aser Chairmen tem 'Get-Together' sentong ka October 19, 2021

anepdang 10:00 ako nungi tenzüka Tora, Sedzü nung agitsü.

JCBKK nungi Honibarnü sangdong ka ajanga ashiba agi, JBKK aser CABYF kübok

Youth Directors aser Chairmen tem ajunga iba sentong nung adentsü aser iba atema T Kezo, JCBKK Pub. & Info. Secy den phone number +91 8413075756 ajanga tongteprateptsü akok.



Nagaland State Legal Services Authority (NSLSA) akhüm nung aser Pan India campaign aser legal services week sentong kübok shilem ka ama, October 15 nü Mokokchung Law College (MLC) den yaritepa Mokokchung District Legal Services Authority (MDLSA) ajanga "right to education" kübok 'World Students' Day' ayonga akaba mapang tangokba noksa nung angur. Iba den külemi nübur nem aser talisa kaketshirtem nem legal service anganüa agütsütsü asoshi MLC nung legal services clinic amenoka liasü, ta osang ka ajanga metetdaksü.

Tanü Dr. S.C Jamir küm 90 ajungba tasoba anogo mungtsütsü

Mokokchung, 16 Oct (TYO): Tsürabur aser lenir taoba Nagaland Chief Minister aser taoba Goa, Gujarat & Odisha Governor, Dr. S.C Jamir küm 90 ajungba nungtem pa tasoba anogo October 17, 2021 nü nikongdang 1:00 ako nungi District Congress Committee Mokokchung office nung sentong ka ayongzüka lir, ta DCCM tir aser tongti zülur, Watimongba aser P. Aley nati sangdong ka ajanga metetdaksü.

Iba sentong nung Mokokchung nungi taoba minister/MLA-tem ajak, NPCC ketdangpur aser züngsem ajak, DCC Mokokchung Advisor-tem ajak, Mokokchung Mahila ketdangpur ajak, Mokokchung DYK ketdangpur ajak, Assembly Constituency shia nungi ACCC ketdangsür pezü (4), Mokokchung Seval Dal ketdangpur ajak aser DCCM ketdangpur ajak arua adentsü asoshi DCCM sangdong nungsa metetdaksüogo.

Tuensang nung SHC & SHM indang training agütsü



National Mission on Sustainable Agriculture 2020-2021 kübok Department of Soil & Water Conservation, Tuensang ajanga October 13, 2021 nü Soil Health Card & Soil Health Management schemes indang training agüja liasü.

Dimapur, Mongputeni/Oct. 16 (TYO): Department of Soil & Water Conservation, Tuensang ajanga National Mission on Sustainable Agriculture (NMSA) 2020-2021 kübok anogo ka Soil Health Card (SHC) & Soil Health Management (SHM) scheme tem indang training October 13, 2021 nü agüja liasü.

JSCO, Beso Chang ajanga iba training nükjidong rateta jembiba mapang India sorkari SHC & SHM scheme indang sentong tajung yangluba rasaa ashi.

Nütsüng züinba aser meimchir inyaksangshi balala ajanga ali temu nung kongshiba, ali temu anepaluyim aser aluyimba maparen balala nung ali anepalutsü ya kanga tongtipang kumogo, ta pai ashi.

Chang-i iba sentong nung aluyimer dang ashiba agi, model village tem densema yimtsüng

balala nungi ali sample 2,280 tendangogo aser item atema SHC yangluba mapang lir, aser iba SHC ya ajanga aluyimer temi pei lu nung ali temu jenjang metettsü.

SHC dak sendakba nung technical tsütsü teyari nungdaka lira meratai arutsüla, ta pai aluyimer ajungshia liasü.

Technical session mapang Programme Assistant, KVK, Seveto ajanga "Importance of soil health: Concept and practices" onük nung ajemdaker jembia liasü. Pai aluyimer dang ali sample bendenba aser item sample bendenba ali nung geo tag asüba yimyatem sayua liasü.

Iba training sentong nung Yimpang, Taknyu, Chendang, Hakchang, Noksen, Longra, Yangpi, Old Chungliyimti, Thronger, Phiri Ahir, Chare village, Chungtor aser Lirise yimtsüngtem nungi aluyimer arua dena liasü.

AIFC Vice-Chairperson atema N Bupenda Meitei shimogo

Imphal, Mongputeni/Oct. 16 (Agencies): Congress tir Sonia Gandhi-i Ningombam Bupenda Meitei ya All India Congress Committee kübok All India Fishermen Congress (AIFC) indang Vice-Chairperson ama shimogo.

2019 Lok Sabha election masüidang Bupenda Meitei ya Rahul Gandhi-i Fishermen Congress nung shimok aser North East India region nung aliba state ti indang fishermen congress repranga liasü.

Pa ya Manipur Pradesh Congress Committee indang spokesperson ka lir.

Pa nem national jenjang nung mapa nungloktsüba atem Congress tir Sonia Gandhi, Rahul Gandhi aser Priyanka

Gandhi nunger dang pelaba lemsatepba mapang, "All India Congress Committee kübok All India Fishermen Congress indang Vice-Chairperson ka ama India tenzüksü künem maongka agütsüba atema Congress tir Sonia Gandhi dang pelar," ta Twitter nung zülutsü.

AIFC mendenpuba aser MP Lok Sabha, T.N. Prathapan lenisüba kübok angopur aser India atema alima nung ango apuba jenjang tajungba akumtsü temolung lema lir, ta Meitei-i ashi.

"Rahul Gandhi aser Priyanka Gandhi Vadra nati ajungmeso masü asübo kü indang yimtenren wadang ya tanü tongtetba metongteti lila," ta paisa tweet asü.

**Education Minister-i
Philobari nung atalokba
maitsür: Assam Congress
Guwahati, October 16, 2021
(Agencies):** Tinsukia kübok
Philobari nung tesayur ka
kaketshir tsüngdang
apudakdaksüba atema Assam
ajungalen nisungtem
jashidaksüogo.

"Tawa Assam nung Guru-shishya parampara maaksüdaksüba atema sasa bilemer" ta Assam Assembly nung Leader of Opposition Debabrata Saikia-i ashi.

Tetsür kati gari lenmang nung PWD workers aika dak gari agi atsük saka la nem bail temelaba agütsüdang Chief Minister-i bushisüngdang asütsü tuyu aser tai tongloksür aputsü nangzük. Ano, iba tetsürla yariba atema doctor ka apu. Ajsüüaka, Chief Minister aser Education Minister nati iba maaksü mapa atema ola madokba ngua mepelar" ta Debabrata Saikia-isa ashi.

"Sorkari teyari magütsüba ajanga college-i mapa inyak. Anungji infrastructure shitak ayutsü atema senotsü nüngdaker. Iba ken o ya olemtep tajung lia angatetteptsüba liasü saka pei sasa ozüng benshia mapa inyakba ya magizüker. Aibelenerem merenshitsu" ta paisa metetdaksü.

Taoba mapang-a camera nung tesayurtem aika maaksüdaksüogo aser iba tebilemsü khuret ya Chief Minister-i abentsü.

"Education Minister-i iba tatalokba maitsüba atema kanga temolung shiranger. AASU-i iba tatalokba nung shilem agir parnok züngsem ka anentsüba pelashishia agizüker" ta Assam State Congress spokesperson Bobbeeta Sharma-isa ashi.

"Alima ajungalen tesayurtem akhümsübur aser küm 27 tashi tesayur ka inyaka aruba nisung ka nem apudakja maaksüdaksüba ya magizüker" ta Sharma-isa ashi.

"Sorkari bushisüngdang asütsü tuyuogo ta onoki osang angazükogo saka kodaser police lia iba mapa inyak ta onoki süngmanger. Kechiba parnok (police) menokdang? Tanü shia meteter aliba lima ka nung tesayur ka kechiba yamai mezüngmeshi? Tesayurtem aser taintem mezüngmeshiba inyakyim ya asen chirnur nem angazüka benshidaksünür asü" ta Bobbeeta Sharma-isa metetdaksü.

**ULFA-I lennir Jugen
Mili temai adok**

**Guwahati, October 16, 2021
(Agencies):** Honibarnü
ULFA-I lennir tejen Jugen Mili
(Himalay Asom)-i Assam police
tsüngdang temai adokogo.

Tesüüba küm ka tsüngda ULFA-I lennir tejentem Drishti Rajkhowa aser Jibon Moran na temai adokba sülen Jugen Mili tasembuba kümogo.

Jugen Mili ya Dibrugarh district nungi lir. Pa ya 1996 küm ULFA nung aden.

Jugen temai adokba ya sorkari telungpurtem anir arutsü merangba nung tajangzük tulu ka lir.

Küm 25 tashi ULFA-I züngsem ka lia aruba sülen Jugen Mili-i temai adok.

Piles Anepaluba - Kabiraj dang alakteta pelaba metetdaksür. Piles, Fistullah, Gastric, Sinus aser Tonsil-Athjma agi ni kangshia liasü aser Rectum nungi azü alu dang mapang talangka item timtem nungi junga taneptsü mangu. Ajsüüaka, tang **Kabiraj H. Umar Chesam contact no. 8416087414 / 6909717178 National awarded H. Umar Chesam**
Address: Burma Camp 2nd Police point opp. tetuyuba nung anidaka surgery kecha magii (non-surgical) anepalur anogo ishika tsüngda ni taneptsü ngua liasü aser iba sülen tanü tashi kü temang nung timtem kecha mali. **Time: 9 AM - 5 PM**
Yours sincerely - Peteneyolie, Add: 7th Mile



Piles Anepaluba - Kabiraj dang alakteta pelaba metetdaksür. Piles, Fistullah, Gastric, Sinus aser Tonsil-Athjma agi ni kangshia liasü aser Rectum nungi azü alu dang mapang talangka item timtem nungi junga taneptsü mangu. Ajsüüaka, tang **Kabiraj H. Umar Chesam contact no. 8416087414 / 6909717178 National awarded H. Umar Chesam**
Address: Burma Camp 2nd Police point opp. tetuyuba nung anidaka surgery kecha magii (non-surgical) anepalur anogo ishika tsüngda ni taneptsü ngua liasü aser iba sülen tanü tashi kü temang nung timtem kecha mali. **Time: 9 AM - 5 PM**
Yours sincerely - Shilu, Add: Fayaring



DEBTS RECOVERY TRIBUNAL, GUWAHATI
Government of India, Ministry of Finance
Department of Financial Services (Banking Division)
Suwarna Bhawan, House No. 12, New Town Path,
G.S. Road, Ulubari, Guwahati- 781007

NOTICE OF DEMAND TO THE CERTIFICATE DEBTOR(S)
(See Sections 25 to Section 29 of the Recovery of Debts Due to Banks and Financial Institutions Act, 1993 and under Rule 2 of Second Schedule of the Income Tax Act, 1961)
D.R.P.C. No. 3400 / 2019
Bank of Baroda (Erstwhile Vijaya Bank) Kohima Branch
-Vs-
Mr. John Lotha & Ors.

- To,
1. **Mr. John Lotha**
S/o Late Tsemomo Lotha, R/o House No. P/09, Lerie Colony, P.O. Kohima, District- Kohima, Nagaland- 797001.
2. **Ms. L. Ayanla**
D/o Late Longkok, House No. 76, Lower P R Hill Colony, P.O.- P R Hill, District- Kohima, 797005.

This is to certify that a sum of **Rs. 15,26,234.84/- (Rupees Fifteen Lakhs Twenty Six Thousand Two Hundred Thirty Four & Paisa Eighty Four only)** as per details given below has become due from you consequent to a Recovery Certificate issued by the Ld. Presiding Officer by an order dated 06-03-2019 in case No. O.A. 401/2018.

(1) Amount due as per the Recovery Certificate:	Rs. 12,86,370.84
(2) Interest from 01.08.2018 to 02.12.2019 @ 12.25%	Rs. 2,24,864.00
(3) Costs	Rs. 15,000.00
TOTAL	Rs.15,26,234.84

2. You are hereby directed to pay the above sum within 15 days from the Publication of this notice, failing which the recovery shall be made in accordance with the provisions of Sections 25 to Section 29 of the Recovery of Debts Due to Banks and Financial Institutions Act, 1993 and under Rule 2 of Second Schedule of the Income Tax Act, 1961.

3. In additions to the sums aforesaid, you will be also liable for
(a) such interest as is payable in accordance with the recovery certificate D.R.P.C. No. 3400 / 2019 for the period commencing immediately after issue of recovery certificate to the date of realization, and
(b) all costs, charges and expenses incurred in respect of the services of notices and of warrants and other processes and proceedings taken for realization of the dues.

GIVEN UNDER MY HAND AND SEAL ON 14TH DAY OF OCTOBER, 2021.
(S. KUMAR)
RECOVERY OFFICER

**Manipur sorkari 'STAR' education
programme tenzükogo**



**Imphal, October 16, 2021
(Agencies):** Manipur sorkari
education system melenshitsu
atema Honibarnü education
programme tasen ka tenzükogo.
Manipur chief minister Biren
Singh-i STAR Education
Manipur tenzüksü.

"STAR Education Manipur programme ajanga tesayurtem aser kaketshirtem yaritsü" ta CM Biren Singh-i ashi.
"STAR Education Manipur ya Manipur sorkari tenzükba sentong ka lir aser iba yagi education system melenshitsu"

ta paisa ashi.
STAR Education Manipur ajanga technology aser data-driven sabangtem amshia temelenshi bener arutsü alizüng lir.
Iba sentong kübok tesayurtem nem high-quality learning materials, training aser coaching agütsütsü aser technology ajanga teyari agütsütsü.
"Mezüng küm iba sentong ya school 500 nung tenzüksü" ta Manipur chief minister Biren Singh-i metetdaksü.

Piles Anepaluba - Kabiraj dang alakteta pelaba metetdaksür. Piles, Fistullah, Gastric, Sinus aser Tonsil-Athjma agi ni kangshia liasü aser Rectum nungi azü alu dang mapang talangka item timtem nungi junga taneptsü mangu. Ajsüüaka, tang **Kabiraj H. Umar Chesam contact no. 8416087414 / 6909717178 National awarded H. Umar Chesam**
Address: Burma Camp 2nd Police point opp. tetuyuba nung anidaka surgery kecha magii (non-surgical) anepalur anogo ishika tsüngda ni taneptsü ngua liasü aser iba sülen tanü tashi kü temang nung timtem kecha mali. **Time: 9 AM - 5 PM**
Yours sincerely - Loreni Ngelbi, Add: Kohima



Form No. 3
[See Regulation-15 (1)(a)] / 16(3)
DEBTS RECOVERY TRIBUNAL GUWAHATI
Suwarna Bhawan, House No. 12, New Town Path,
Near Hanuman Mandir, G.S. Road, Ulubari, Guwahati- 781007 (Assam)

Case No.: OA / 101 / 2021
Summons under sub-section (4) of section 19 of the Act, read with sub-rule (2A) of rule 5 of the Debt Recovery Tribunal (Procedure) Rules, 1993.
Exh. No. 1304

BANK OF BARODA - VS- MR. SUBASISH DAS
To,
(1) MR. SUBASISH DAS
D/W/S/O- S/o Sri Himangshu Ranjan Das, House No. 11, Sematilla Colony, Dimapur, NAGALAND- 797112.
(2) MRS. SARBANI DAS
W/o Mr. Subasish Das, House No. 11, Sematilla Colony, Dimapur, NAGALAND-797112.

SUMMONS
WHEREAS, OA/101/2021 was listed before Hon'ble Presiding Officer / Registrar on **07.10.2021**.
WHEREAS this Hon'ble Tribunal is pleased to issue summons/notice on the said Application under section 19(4) of the Act, (OA) filed against you for recovery of debts of **Rs. 78,98,036.98/-** (application along with copies of documents etc. annexed).

In accordance with sub-section (4) of section 19 of the Act, you, the defendants are directed as under :-

- (i) to show cause within thirty days of the service of summons as to why relief prayed for should not be granted;
 - (ii) to disclose particulars of properties or assets other than properties and assets specified by the applicant under serial number 3A of the original application;
 - (iii) you are restrained from dealing with or disposing of secured assets or such other assets and properties disclosed under serial number 3A of the original application, pending hearing and disposal of the application for attachment of properties;
 - (iv) you shall not transfer by way of sale, lease or otherwise, except in the ordinary course of his business any of the assets over which security interest is created and/or other assets and properties specified or disclosed under serial number 3A of the original application without the prior approval of the Tribunal;
 - (v) you shall be liable to account for the sale proceeds realised by sale of secured assets or other assets and properties in the ordinary course of business and deposit such sale proceeds in the account maintained with the bank or financial institutions holding security interest over such assets.
- You are also directed to file the written statement with a copy thereof furnished to the applicant and to appear before **Registrar on 22.11.2021 at 10:30 A.M.** failing which the application shall be heard and decided in your absence.
Given under my hand and the seal of this Tribunal on this date: 08.10.2021.
Signature of the Officer Authorised to issue summons.

DEBTS RECOVERY TRIBUNAL, GUWAHATI
Government of India, Ministry of Finance
Department of Financial Services (Banking Division)
Suwarna Bhawan, House No. 12, New Town Path,
G.S. Road, Ulubari, Guwahati- 781007

NOTICE OF DEMAND TO THE CERTIFICATE DEBTOR(S)
(See Sections 25 to Section 29 of the Recovery of Debts Due to Banks and Financial Institutions Act, 1993 and under Rule 2 of Second Schedule of the Income Tax Act, 1961)
D.R.P.C. No. 3407 / 2019
Bank of Baroda (Erstwhile Vijaya Bank) Kohima Branch
-Vs-
Mr. Sherinlo Kemp & Ors.

- To,
1. **Mr. Sherinlo Kemp**
S/o Mr. Rushnlo Kemp, Tesophenyu Village, NH- 61, Wokha Road, P.O. & P.S.- Tseminyu, District- Kohima- 797109.
2. **Mr. Rushnlo Kemp**
S/o Late Ngabu Kemp, Tesophenyu Village, NH- 61, Wokha Road, P.O. & P.S.- Tseminyu, District- Kohima- 797109.
3. **Mr. Senepfu Kemp**
S/o Late G. Kemp, Tesophenyu Village, NH- 61, Wokha Road, P.O. & P.S.- Tseminyu, District- Kohima- 797109.

This is to certify that a sum of **Rs. 14,09,140/- (Rupees Fourteen Lakhs Nine Thousand One Hundred Forty only)** as per details given below has become due from you consequent to a Recovery Certificate issued by the Ld. Presiding Officer by an order dated 26-03-2019 in case No. O.A. 417/2018.

(1) Amount due as per the Recovery Certificate:	Rs. 11,84,417.00
(2) Interest from 25.07.2018 to 02.12.2019 @ 12.25%	Rs. 2,10,723.00
(3) Costs	Rs. 14,000.00
TOTAL	Rs.14,09,140.00

2. You are hereby directed to pay the above sum within 15 days from the Publication of this notice, failing which the recovery shall be made in accordance with the provisions of Sections 25 to Section 29 of the Recovery of Debts Due to Banks and Financial Institutions Act, 1993 and under Rule 2 of Second Schedule of the Income Tax Act, 1961.

3. In additions to the sums aforesaid, you will be also liable for
(a) such interest as is payable in accordance with the recovery certificate D.R.P.C. No. 3407 / 2019 for the period commencing immediately after issue of recovery certificate to the date of realization, and
(b) all costs, charges and expenses incurred in respect of the services of notices and of warrants and other processes and proceedings taken for realization of the dues.

GIVEN UNDER MY HAND AND SEAL ON 14TH DAY OF OCTOBER, 2021.
(S. KUMAR)
RECOVERY OFFICER



TIR YIMYIM YIMOBILEM (EDITORIAL)

DIMAPUR AMUNGNÜ, MONGPUTENI(OCTOBER) 17, 2021

Putepdaksütsü inyakba mapa

Tsüngremi alima nung alitsü nisung yanglu aser longsu-longsua jangratema alitsü asoshi soyapokdaksü. Ajisüaka, item nisungtem jagi Tsüngremi ashiba manga temenen menaba ajanga Tsüngrem o nisungtem na tsüngda meputep aküm. Aji oda, nisungtem temenen agi Tsüngrem nungi piladaksü aser parnoki parnok yanglusang amadok nungji Tsüngrem kanga jashi liasü. Iba ama tia ka nung alijak nungi ano meimchirtem samatsü lia, Laishibai ashir, "Tsüngremi alima kanga meim nung, Pai pa ajaso chir ka dang aliba meimchir temenen pongitsü asoshi angati agütsü, anungji shirnoki Pa dak amangdir kodanga mesamatsü saka teti taküm angutsü." Tetezü, Tsüngrem o meimchirtem na tsüngda meputepteti aliba Yisu Khrista alimai aruba ajanga putepshidaksü. Alima nung meimchir taküm yimya, achiajem aser sobaliba ajunga tesempatsüka liasü. Aji oda, meimchirtemi Tsüngremi aginütsüsa kecha meinyak, ajisüaka Yisu Khrista nisung kümer alimai aru aser timtema kangki nung Pa taküm bendanga agütsüba ajanga meimchirtem temenen taidok angu. Tetezü meputepi aliba putepdaksütsü asoshi inyakba maparen nung nisung kar mapang, rongsen aser taküm bendanga agütsütsü nungdaker. Meputepi aliba puteptsüba jenjangji tasak. Odangbo meputeptetsü. Puteptsü atema kari aremzüksüla, takoksa, timtem aser maksü aremstsüla. Aji oda, meputepi aliba puteptsü atema taidok agütsüteptsü nungdak adoker. Item timtem khuret ajakji Yisu Khristai aben nungji asenokbo Tsüngrem den ano tesendaktep tajungba yanglutsüogo. Yisu Khrista tenung maneni sangdi. Joko, asenok dang Yisu Khristai inyaksü ashiba tongtibang mapa kaji, "ni kechi koma nenok meim, yamaji nenok rongnunga kati ka den meimtepang," ta ashiba o ya asütsü. Aji oda, asenok ya Yisu Khristai tenyaba mapa inyakerterem lir. Asenok ya Tsüngremi osangbenertem aser yimjung yanglurtem asütsüla. Asenok tai temenen ajanga Tsüngrem den dang masü saka tangar dena meputeptetter. Iba jagi tanü asen lima ya meputep mesüra tsükchitep agi sünga lir. Asenok temenen ajanga kibong balalular, medemer aser kinüngertem rongnung meputep adoker aser arogo dena raksar. Temeneni asenok rongnung tenük merem aser mulung melemtetp adokdaksür. Item meputeptetba temenen ajak madak takok angutsüba asenoki tama Tsüngrem den yimjung yanglu nung dang aser Pa den putepa ali nung dang akoktsü. Asenok mulung nungbo tangar sempar saka tebang agibo puteptsü jembir aser asenoki tangar nem taidok magütsütetter saka asenoki yimjung indang jembia senzür ta süra, ibajibbo anemsü agi yimjung bushiba mapa ka asütsü. Iba jagi Tsüngremi mepeladaksütsü aser nisungtem putepdaksütsü makoktsü. Lashiba ajanga Tsüngremi asenok nem kanga inyadaksünübaji tangar dang temeim sayutsüba ya lir. Tetezü, asenok tangar den putepa alitsü aser tangar o tangar na ta putepa alitsü merangdaksütsü. Yohan 13:35 nung ashir, na Yisu dak amanger aser pa nüsünga ta tangari metettsüba nai tangar dang temeim mapa inyakba ajanga metettsü. Tsüngremi koda meim yamaji asenokia tangar dang meimtsüba dang Yisua aginer. Temeim agi dang tai adoker aser temeim agidang putepdaksür. Tangbo joko Tsüngremi asenok nem tangar asoshi putepdaksüba mapa inyaksü nunglokja lir. (2 Kor.5:18). Anungji, asenokbo meputep adokdaksür masü putepdaksürtem asütsüla.

OLEMSABANG

Co-Pastors Inyakyim

Narola McFayden

(Yashi adok nungi...)

Co-Pastors Mapa nung Maongka aser Tetsükdaksü (Opportunities and Challenges)

Mezüngbuba nung Co-Pastori mamatsüba, Tsüngrem tenzükba mapa nung ni/na ya tongtibang masü. "Ministry is not about you" saka "Ministry is about God." Yisu Khristaji tama sädaksütsüla aser asenok pa nem len anitaksütsüla. Kechiba süra, Yisu Khristaji arogo nung tekolak aser asenok ajaki Yisu Khrista tenzükber.

Tsüngrem tenzükba mapa nung apuani Co-Pastori liromedema inyakba ajanga arogo nung nema iba amala lenisüba nung kasa lemsatepa inyaksü angazükdaksür. Pastor mapa inyaksüji temela masü. Co-Pastors tsüngda mangatetep, tetoktep aser mokachi lira mapa takok mangutsü. Anungji pastor anaprongla ola (voice) aser tashi (authorityji) saku ta angateta apuani jagi inyakyim ajak nung nüburttem dang sayutsüla. Kechi nung südir süaka, tena opang ajemtsü tongtibang. Co-Pastors mapa lemsatepba inyakba aser iba khuret angateta kati ka nungittepba tenzükba ajanga tenzükba mapa nung merongjeni, takok ngua, tsüra tema, ajak temulung süa inyaker.

Tetsükdaksü rongnung tongtibangbaji, "Finding balance between both being present as well as not double-resourcing everything." Co-Pastora ta sür mapa ajak nung anapronglai shilem agitsü ta masü. Koba nung anaprong atentsü koba nungbo ka dang atenyonga kecha masü ibaji benteta arogo nungtem nem angatetdaksütsüla.

Co-Pastors Mapa Lemsaba (Division of Responsibilities)

Co-Pastors mapa lemsatepba nung tongtibangbaji sayutsüngitsü mapa ya lir. Sayutsüngitsü ya Pastor ka atema tongtibang teinyaksü mapa lir. Iba mapa ya lokti-i anguba mapa. Anungji Co-Pastori iba mapa ya teyongi alemer. Yamaji lokti nung aikati ngua shilem agiba mapa teyongi lemsaba ajanga nüburttem nem Co-Pastorji ka temaba mesüra ka tekübokba ta masü, saka kasa jenjang ta nüburttem nem mapa agi metetdaksür. Meeting tapu balala nung lenisüba pastor ka teinyaksü. Iba shilemjia teyongi lemsar. Kechiba süra kati dang iba amala meeting ketang süra iba Pastorjiang tongtibang ta nüburttemi meiblemstsü atema teyongi lemsar. Kiboksem, shiranger semdangtsü, sati kuli, asü-pila sentong, amala mapajia teyongi lemsar. Arogo staff management aser rongsen leman bushiba mapatem-a Co-Pastors jagi teyongi lemsar. Yamaji Arogo nung kari tasüngdangba kar lira shiba dangi aotsü aji jangja jangja lateta yutsür.

Arogo shia pastor dak nungi aginüba aser imlabaji balala lir. Anungji na koba arogo tenzüktsü aja, iba arogo tang nungdabaji kechi ibaji asüngdangtepa Arogo menden den tongteper Co-pastors sempet meteta mapa lemsar. Arogo ka nung Co-pastors inyaksü mechi Co-pastors jagi küna mapa yamai lemsaner ta proposal bener arur ta ashir. Saka arogo mendeni ibaji repringdang yamai langzü, tetenzük nungi Co-Pastors anaprongji jenjang saku ta angatetsü mechi inyakyimjia yamaji saku lemsateptsüla. Yangi tongtibangbaji kinungtsü jagi mezüngbuba arogo nung sayutsüngitsüla. Office tulubaji kinungtsü nemji agütsütsü junger. Ano arogo nung tebur jenjang temaba ta bilemerjia lir asünung iba amala tangatetba melenshitsu atema, mezüng yongi Co-Pastors anapronglai shilem tongtibang saku lemsatepa inyakbaden ita sen saku agütsütsüla ta arogo mendeni Co-pastors dang langzüa zulu. Iba otsü nungya asenok tangazüktsü aika lir ta bilemer.

Tenzükba Mapa Arrtsü (Professional Boundaries)

Tenzükba mapa aser nija taküm ana tsüngda arrtsü tajung tetenzük nungi lateta alitsüla. (Establish and maintain proper work and life boundaries from the beginning). Toklanga tenzükba mapa nung iba ya kanga tongtibang. Ano apuani Co-pastors inyakba mapa nung iba amala arrtsü ya kangasa tongtibang ta teinyakdangteri langzü. Mekümdangra pastortemji arogo mapa dak alaka nija mapa kecha mali ama arogo nung bilema imlaba ajanga toklang tenzükber shi nung lular (ministry burnout). Iba amala nungi kümzüksü meji, mezüng yongi arrtsü (boundaries) tejangja latetsüla. Tetezü tanga mapa nung inyakerterem office hours maintain asüba ama toklang tenzükbertema iba amala mapang lateta arogo nungtem nema metetdaksütsüla (emergency situation inyakyimji balaka).

Arogo aika nung co-pastortem full time pastor ka ka ama inyaker aser arogo kar nung half time ana semteper full time ka ama inyaker. Anungji Co-Pastors anati week-days office hours lemsateper aser Deobar (Sunday) anogobo pastor anaprongla lokti sentep nung alir. Aser sendong nung maliba ajungben mapa kar asoshi pastor nüburttem nungdabba mapa arura; shiba office nung ali iba pastori item mapaji agizüka inyaker.

Establishing clear professional boundaries dak sentakba ano tongtibang kaji ya; Arogo nung aser Co-pastors na tsüngda taginüba aser inyakyim nung telemsa madoktsü asoshi tetenzük nungi arogo inyakyim jangja jangjaa metetdaksütsüla. Ano nisunger yimya asünung arogo nung kari Co-Pastors tsüngda tetoktep adokdaksütsü mapa inyaksü, saka Co-Pastors aser arogo mendeni iba amala sendong nokdangtsüla. Kechiba süra iba amala mapa ajanga arogo nung teraksa adoker.

Co-Pastors nungdabba arogo nung temettsü

Arogo kobai Co-Pastors jatir anaprong nem tenzüktsü ajaba kuli tejangja agütsütsüla (clear and equal terms of employment must be provided to both co-pastors by the congregation). Arogo menden aser Co-pastors na tsüngda tangatetep tajung aser tejangja alitsüla. Arogoi Co-pastors nungi kechi imlar itemji jangja jangja Co-pastors den lemsateptsüla. Arogo nungtem den Co-pastors inyakyim tejangja lemsatepa asenok taginübatem angatetdaksütsüla. Aser nüburttem anaprongji jenjang saku ta arogo nungtem nema angatetdaksütsüla.

Co-Pastors inyakyimji asen nüburttem atema tasen asünung nüburttem aikati iba amala lenisüba parnok nükla aser shisatsü agi metongtetsü akok. Anungji tetsür aser tebur saku Tsüngrem tenzüktsü aja ta asüba tangatetba den tetsür pastor inyaksü tajung ta angateta agizüktsüsa tesayuba tajung Arogo nungtem nem agütsütsüla.

Co-Pastors teinyakdak purisa ashibaji, co-pastors inyakyim ya joko talangka inyaka arur asünung iba sannükba model ya kanga junger. Tenzükba mapa ka lemsatepba inyaksüba temoatsü aser tanela anir aruba mapa nung iba ama teka amteper lemsatepba inyaksü angazükdaksütsü tim. Apuani iba ama sannükba mapa nung teka amteper inyakba ajanga Tsüngrem mesüka yangluba tebur aser tetsür nati tena nem agütsüba sempet balala amshia Mosa aser Aron ama, Paul aser Barnaba, Paul aser Sila ama, Yisu nüsüng anana Osangtajung sangdongtsü yokba ama, aser Priskila aser Akula ama, teka amteper katika ajongmesoa Tsüngrem tenzükba ajanga Tsüngrem sentsüwangshidaksür aser sannükba mapa nung merongjeni tsüratema tenzükber ta parnok teinyakdakpuri langzü.

Otem

Laishiba otsütem ajanga tenzüktsü ajaba nüburttemi parnok tajaba nükjidong atongtsü mechi teka amteper pei taküm sama metsüba tasü ita Tsüngremi tenyaba mapa inyakba asenoki nguogo. Iba ocet azünger kari Co-pastors yabo asen lima atema masü ta bilema alitsü akok. Inyakyim tasenji aika nükla agi metongteter. Chiyungtsü tajung ka indang tebang agi rarsaa ashiba agi tangashir-i iba chiyungtsüji ajung majung meshitet. Menakdanga chidang nungang ajung majung metettsü aser shitettsü. Iba amaji, sannükba mapa inyakyim tasenji tangaribo tajung ta amshia arur. Asenlima arogo nung iba inyakdang nungang ajung asü majung metettsü asünung asenoki meinyakdang obendang magütsü inyakdangtsü ta asüba tanela nung arogo karibo mapa küma inyaksü merangtepedi ta ayongzüker.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Changtongya jila nung BSI Changtongya Branch semzükogo



Changtongya, October 16 (TYO): October 15, 2021 nü Bible Society of India (BSI), Dimapur Auxiliary-i Changtongya Town Baptist Arogotem nung BSI Changtongya Branch semzüksüogo; Changtongya Branch kübok Arogo 18 lir.

Tajungshi o jembidang Secretary BSI Mokochung Branch, Temsu Deacon-i, "Laishiba ya tamangertem atema tongtired lir. Nija aser Arogotem ajanga nisung kari Tsüngrem O angashia taküm kümzükra ibaji temoatsü kanga tulu," ta pai ashi.

Resource mobilizer, Marwati-i, Bible Society of India-i tamangertem nem jenjang dalang agi Temeshi Laishiba agütsür; BSI-i amangbapurtem nem sarasadem ajanga nungitdaksüner, aser ibaji ajanga nisungtemi pei oshi nung

Laishiba anguba nung yaritsü, ta ashi.

Auxiliary Secretary, Rev. Yiepetso Wezah-i, "Teinyaktsü wadang jenti lir. India sorkar data ajanga ashiba agi, India nung recognize asüba oshi 1,652 lir aser iba nungjagi Bible Society of India-i Laishiba rangben (Tejen Lai aser Tasen Lai naprongla) oshi 74 nung agütsür aser Tasen Lai kija oshi 92 nung agütsür. Tang oshi 81 nung Laishiba meyipzükdar. Arogotem teyari ajanga dang linük, kin aser oshi balala jembir ajaki Tsüngrem O angashitsü aser ibaji ajanga Tsüngremer Tenyaba Wadang tuluba ataloktsü," ta metetdaksü.

BSI Changtongya Branch nung office ketdangpurtem yamai shim- President Rev. T. Aliba, Associate Pastor, Changtongya Town Baptist Church, Secretary Matsung, Pastor, Changtongya Yimsen

Baptist Church aser Treasurer Moa Pastor, Longchara Baptist Church.

Iba sentong ya BSI Mokochung Branch Treasurer, Wapang leniba nung agi, Nukshiyim Baptist Arogo pastor, Rev. Repa-i temoatsü meshia sarasadem aser Changtongya Town Baptist Arogo pastor, Rev. Temshi-i lokti pelaa agizükba o jembia liasü.

Changtongya Baptist Arogo pastor, Rev. I. Wati Jamir-i meshiteta sarasadem aser Associate Pastor, L. Amenla Pongen-i sentong tembanga sarasadema liasü.

Changtongya Town Baptist Arogoi BSI branch semzükba sentong den repsema anogo ka seminar par Arogo nung ayongzükba atema BSI-i parnok dang pelaba lemsatepba den külemi Arogo balala nungi iba sentong nung adener ajak danga pelaba lemsatep.

Karnataka sorkari missionary tem anema bushisüngdangtsü tuyu

October 16, 2021: India kübok Karnataka state sorkari ketdangsertem dang Khristan missionary tem anema bushisüngdangtsü tuyuogo, ta International Christian Concern (ICC)-i metetdaksü.

Karnataka nung anti conversion ozüng ka benoktsü tebilemba lia state sorkari Khristan missionaries anema bushisüngdangtsü tuyur.

Bodhbarnü Backward Classes & Minorities Welfare Committee senden amenba mapang nung Khristan missionary tem anema bushisüngdangtsü atema lemteta liasü. Iba senden nungji BJP MLA Goolihatti Shekar densema MLA aika aden.

Senden nung jembidang BJP MLA, Shekar-i Khristan missionary tem ajak registration agidaksütsüla, ta ashiba den külemi state nung Arogo shilem 40 bo unofficial aser state-i recognize masü, ta metetdakja liasü.

Senden nungsa committee züngsemtemi Hindu yimsü toktsür Khristan yimsü dangi meyipertem nembo sorkar

teyari balala magütsütsüla ta jembia.

Tawa Karnataka nung BJP züngsemtemi anti-conversion ozüng ka benoktsü atema jembia arudar. BJP lenirtemi ashiba agi, Karnataka nung Khristan yimsü dangi meyipba ya mazüokteti kümogo, anungji yimsü meyipba nokdangtsü atema anti conversion ozüng ka nungdaker.

Chief Minister Basavaraj Bommai-i, "Iba dak sendakba nung sorkari linük tesem balala nung state balalai benoka aliba ozüngtem shisadangdar. Kobi melii tekaraba nung Karnataka nunga ozüng tasen ka benoktsü," ta metetdaksüogo.

Tzüngluruwa mongpu assembly senden mapang nung Shekar-i state nung Khristan yimsü dangi meyipba onük süoka liasü; paisa tetsü-a Khristan yimsü dangi meyipogo, ta metetdakja liasü.

Ajisüaka tan hopta tetenzüklen osangbenertem den jembidang Shekar-i, tetsü 'Ghar Wapsi' program ka nung adenba sülen tanaben Hindu yimsü dangi meyipogo, ta

metetdaksü.

Tang India tesem ajungalen Hindu yimsü alia amangertemi Hindu nunger Khristan mesüra Islam yimsü dangi meyipba tenük yoka repranger aser Khristan o Muslim nungeri Hindu nunger sensakertem mesüzüka yimsü meyipdaksür, ta tai tongloksür.

India nunger linük temzüng Arrla 25 ajangabo peii melungba yimsü agizüktsü, beshitsü aser pei yimsü proktsü atema senso ajak nem temeden agüja lir, ajisüaka tamangba yimsü meyipba nokdangtsü atema state aikati anti-conversion ozüngtem benokogo.

Iba dak alia Khristan mesüra Islam yimsü dangi meyipertem nembo sorkar teyari balala magütsür aser loktiliba nung sendoker.

Hindu yimsü alia amangertemisa anti-conversion ozüng nung ajemdaker Khristanem reshikangshir aser Tenla kitem shibangtsür. Iba ozüng kübok police-i nisung aika puogo ajisüaka tang tashi nungbo shinga aija mali.

ANOGO ABEN TSÜNGREM DEN

TANGAR TAKOK NUNG PELANG

Tepelartem den pelatepang.....nenok kati ka den temulung kasa liang. Ulutsü mapa indang

tebilem, saka ajemalu mapa nung jajang. Rom

12:15-16

Ajemalu tanela aliba temaitsü kaji tangar takok nung pela-a bilemstüba ya lir. Tangar takok mesüra tepela nung tenüngsang magütsüba nisungji nukmerem aser ajemalu maliba temaitsü, saka chichiba ajemalu jagi tangar takok nung pelateper. Külem tenzüker mesüra asen medemeri tenüng tajung mesüra takok mapa ka inyaktet nung kanga junger ta ashitsü melen pa/la mapaji tilutsütsü mesüra tenüng senra aji tangar takok nung pela-a bilemba tanela masü. Saka ajemalu jagi teti tangar takok asoshi Tsüngrem tenüng sangteter.

Tanü asenok temenen lima nung maparen ajak tetoktepbe tanela agi atidanger, aser külem lesembapur rongnung nukmerem aser pei ulutsü dang merangba tanela apoktsür. Tangari asen dang tajungba inyaktetra yangji pelatsü melen tejashi aser nukmerema bilemra ne dak ajemaluba tanela agi anünga lir.

Kodang Israel-tsürtemi, "Saul chubai merijang tepset aser Dawid-i merijang ter tepset" ta ken aten Saul chubai tenükmerem. Pai Dawid-i takok bener aruba nung mepela saka jashia bilem, kechiaser pai pa ulutsü atema dang bilem. Na atema-a tasak asütsü akok, saka nai merangang aji yimya süba--adoktsü. Tangar takok nung pelatsü merangang.

SARASADEM

Kibuba tangar takok nung mepelai lira tatok agüjang. Ajumalua tangar takok nunga temulung kasa pelatsü yariang. Amen.

India nung kenü yongi Khristanem anema inyakba tatalokba 13 liasü

October 16, 2021: North India nung anogo ka kija nung Khristanatem anema inyakba tatalokba 13 tashi liasü, ta Evangelical Fellowship of India (EFI) Religious Liberty Commission (RLC)-i metetdaksüogo, ta International Christian Concern teloki metetdaksü.

Amongnü- October 3, 2021 nü kija nung Khristanem dak azükba, apuba aser tekülem sentong tagidak mapang nung timtem agütsüba tatalokba 13 tashi liasü.

Tatalokbatem rongnung, Uttar Pradesh kübok Maharajani nung Khristan 30 shi adenshir tekülem sentong tagidak mapang nung Hindu nunger telok ka arua timtem agütsüba aser Khristanem dak azükba densema lir. Iba tatalokba sülen mapang tatsüka tsüngda kasa area nungjisa Hindu nungertemi Khristan tetsür ka dak azük.

Kasa anogo nungjisa Hindu nunger telok ka Khristan kibong kati kati oa yangji tekülem sentong nung adener Khristan 15 dak azük. Khristan pongubo kanga mejungi yiru aser parnok rongnung Rajat Kumar bo

taküm mekümzükttetsüsa lir. Kasa anogo nungjisa Hindu nunger telok kati Khristan tsür, Kanika leniba nung tekülem sentong agia aliba mapang nung Khristanem dak azük aser lar ki bendoktsü.

October 13 nü kija nung Khristanem anema inyakba tatalokba 13 liasü, ajisüaka iba dang nungjagi timba alitsüa akok. Taküm June ita tatembanglen nungi tenzüka Khristanem anema inyakba kanga bulua atalokdar.

Anti-conversion ozüngtem nung ajemdaker Hindu yimsü alia amangertemi Khristanem dak azükba aser tekülem sentong tagidak mapang nung timtem agütsüba kanga bulua ataloker.

"India nung reshikangshi tia nung aliba asen adianutem atema sarasademjang ta onoki mepishir. Khristanem anema inyakba aser amokmeren liaka Arogo tashi itshitsü atema sarasademjang. Iba dak alia Arogo anema inyakertemi Khrista temeim meteta temelung meyiptsü atema sarasademjang," ta ICC-i mepishia metetdaksü.



Rampur, October 16, 2021: Honibarnü Rampur nung Hunar Haat semzükba sentong nung Union Minister for Education Dharmendra Pradhan, Union Minister for Minority Affairs Mukhtar Abbas Naqvi aser Union Minister of State for Parliamentary Affairs, Arjun Ram Meghwal nung adenba noksa nung angur.

CWC senden tenzükogo; Congress Tir election agitsüa akok

New Delhi, Mongputeni/October 16 (Agencies): Honibarnü New Delhi nung aliba Congress party headquarters nung Congress Working Committee (CWC) senden tenzükogo party Tir, Sonia Gandhi densema Congress lenirtemi tongtibang onüktem nung o lemteptenzükogo.

CWC-i organisational elections, taruba assembly elections aser tang linük yimtenren tensa densema onük balala nung o lemteptsü.

CWC senden nung Sonia Gandhi den taoba mapang party Tir, Rahul Gandhi, Congress general secretary Priyanka Gandhi Vadra, Congress party nungi chief minister tem-Ashok Gehlot (Rajasthan), Bhupesh Baghel (Chhattisgarh) aser Charanjit Channi (Punjab) nung aden.

Senden nungjisa party nung lenir taintem Ghulam Nabi Azad

aser Anand Sharma nata aden. Congress party nung tongti telemteba agiba tentetji Congress Working Committee (CWC) lir, aser party nung lenir kari tongtibang onüktem lemteptsü atema senden amentsü akhangba nung ajemdaker CWC senden ayongzük.

Congress' state units-Punjab, Chhattisgarh aser Rajasthan state tem nung Congress lenirtem telung nung mangatettep adoka aliba mapang ka nung iba senden ya ayongzük.

Congress nung G-23 lenirtemi CWC senden ayongzüksü mepishia liasü. Taoba ita Kapil Sibal-i toklang tenzükog Tir ka malidang shibai telmetba agitsü, ta shia CWC senden ayongtsü mepishia liasü aser taoba mapang Rajya Sabha nung opposition lenir inyaksang, Ghulam Nabi Azad-ia shidi ka ajanga Congress Tir, Sonia

Gandhi dang tekaraba nung CWC senden ayongzüksüla, ta mepishia liasü.

CWC senden nungsa Congress Tir tasen shimtsü atema election agitsü asoshi jembitsü imlar. Taküm January 22 nü CWC senden amenba mapang nung Congress-i 2021 küm June ita tashi nungbosa party Tir shimtsü lemteta liasü saka coronavirus wara aliba agi May 10 nü CWC senden amendang Tir shimtsü atema mapang atsulang.

CWC senden nungsa osettsüset/aonsotsü jenjang atuba, aluyimertemi longkak aitba aser linük rongsenkettsüng jenjang majungba onüktem süoka jembitsü imlar.

CWC senden nungsa party telung nung melung masürtem, aikati party toktsüba aser election nung party-i takok manguba onüktem süoka jembitsü.

Taruba hopta EAM, S Jaishankar-i Israel semdangtsü

New Delhi, October 16 (Agencies): Taruba hopta External Affairs Minister, S Jaishankar-i Israel semdangtsü; Israel nung Naftali Bennett leniba nung sorkar tasen akümba sülen tang mezüing linük ana tsüingda temaba jenjang ka nung senden amentsü.

Israel semdangba mapang nung Jaishankar-i Israel Foreign Minister, Yair Lapid den senden amentsü. Teloktept sorkar nung Lapid ya Yesh Atid party nung tongti lir. 2023 küm pai Bennett melenzüka Ato kilonser

akümtsü. Israel foreign secretary Alon Ushpiz-i twitter ajanga, "@DrSJaishankar-i Israel semdangtsü lia nenok ajak den Dussehra benjung salem lemsateper. India ya asalentong partner ka aser tembar tajung ka," ta metetdaksü.

India aser Israel tesendaktep kanga junga lir aser linük ana tsüingda tesendaktep lenlatemji India terenlok atema kanga tongtibang. Linük ana tsüingda aluyimba aser tzü lenla nunga tesendaktep lir aser India nung agriculture partners

rongnung Israel ya kanga tongtibang linük ka kümogo.

Security aser defence sectors nunga India aser Israel nati amalitepa inyaker, talisa anüdoklen Ladakh nung India aser China na tsüingda aiben mangatettep adoka aliba mapang ka nung India nung security tsütsü tayongzükba aika aliba ajanga Israel aser India na tsüingda amalitep jenjang ano tajungba kümogo. Tang India ketdangseri Israel semdangba ajanga linük ana tesendaktep ano tajungba akümtsü imlar.

Lenmang nung yirua alirtem hospital-i anir ora senpet agütsütsü

Bhopal, October 16 (Agencies): Gari lenmang lendong nung nisung asüba ajema kümdaktsütsü nükjidong nung Central scheme ka tenzükogo aser Madhya Pradesh nunga iba scheme tenzükogo, ta Honibarnü state ketdangser kati metetdaksü.

'Good Samaritan Scheme' kübok gari lenmang nung lendong ataloker yirua alir hospital mesüra trauma centre-i shibai anir odir pa nemji senpet sen 5,000 agütsütsü.

"Madhya Pradesh nunga Dussehra (October 15) anogo nung Centre-i benokba Good Samaritan Scheme tenzükog," ta Honibarnü State Traffic & Road Safety Additional Director General of Police (ADG), G Janardhan-i metetdaksü.

Aiben nisungtemi gari lenmang nung lendong ajurur alirtem yaritsü arendaker, anungji lendong ajurur alirtem yaritsü aser takümtem kümzüksü atema nüburtem ajungshitsü nükjidong nung iba scheme tenzükog, ta pai metetdaksü.

Taküm August ita nung Parliament nung Ministry of

Road Transport & Highways-i, 2020 küm India nung gari lendong 3,66,138 ataloka liasü aser item lendong nung nisung 1,31,714 süogo, ta metetdakja liasü.

Madhya Pradesh ADG-isa, gari lenmang lendong nung tekolok aser tongtoret yirur alirtem mesüra parnok hospital-i anir oa tajemba agi anogo asem tashi mongra mesüra surgery agitsüsa kümra parnok kümzükertem senpet 5,000 angutsü temsüa lir, ta metetdaksü.

Janardhan-isa, Tajung Samaria shia nem senpet 5,000 den pelaba certificate kaka agütsütsü aser küm shia nisung kati iba senpet ponguben tashi angutsü akok, ta metetdaksü.

Yirur alirtemji 'golden hour' nung hospital-i anir aotsüla, ta metetdaksüba osang jangjashitsüandang pai, "Motor Vehicle Act Arrla 2 (12 A) kübok iba (golden hour) tetezü nisung ka kanga mejungi yirur lia ghonda ka tsüingda tasü nungi kümzükba lir," ta metetdaksü.

Ano yirur alir ka nisung anati kümzükra senpet 5,000 ji tena lemsatsü, ta paisa metetdaksü.



October 16, 2021 nü Jammu nung aliba GGM Science College nung Jammu Joint Students Federation (JJSF) züngsemtemi 1966 küm longkak aitba mapang asür kaketshirtem nem akhüm agütsüba noksa nung angur.

India-i Afghanistan atema NSA senden ayonger

New Delhi, October 16 (Agencies): Afghanistan dak sendakba nung November ita nung National Security Advisors (NSAs) senden ka ayongzüksü atema India-i benokogo, aser iba senden nung adentsü atema Russia densema region nung aliba linük aika jaokogo.

Taoba hopta Pakistan nema iba senden nung adentsü tejaokba shidi agütsü.

Pakistan National Security Advisor, Moeed Yusuf-a iba senden nungji adentsü jaokogo aser pai iba senden nungji denra pai tang mezüing Delhi semdangtsü.

Taküm Dushanbe, Tajikistan nung Shanghai cooperation organization NSA senden nung India NSA Doval aser Pakistan NSA Yusuf naprong aden saka tena jurila senden memeni liasü.

Afghanistan nung tensa tamajungba akümba atema

aikati tebilemtsü akaba mapang ka nung iba senden ayongzükog. NSAs sendenji Delhi nung November 10 mesüra November 11 nü amentsü tebilemba sentong lir.

Taruba hopta Russia-ia par linük yimtiba, Moscow nung format senden ka ayongzükog lir aser iba senden nungji Taliban, Pakistan, China aser India nungi ketdangsertem adentsü. India-i iba senden nungji shilem agitsü lemtetogo.

Taoba hopta osangbener den jembidang India MEA otongdar, Arindam Bagchi-i, "October 20 nü Moscow nung format senden nung adentsü atema onok nem tejaokba shidi agütsüog. Onoki iba senden nungji shilem agitsü. Iba senden nungji shiba adentsüar tang tashi memetet saka Joint Secretary level nung adentsü," ta metetdakja liasü.



October 16, 2021 nü Kerala kübok Kochi nung tzunglu sashia aruba mapang tebur kati shi amer nashi chiyimdaktsüba noksa nung angur. Weather office-i Kerala kübok district pungo nung tzunglu kanga sashia arutsü, ta tekümdangtsü osang metetdaksüog.

Asean lenirtem senden nung Gen Min Aung Hlaing mejaoktsü



Gen Min Aung Hlaing

Bandar Seri Begawan, Mongputeni/Oct. 16

(Agencies): Myanmar nung February ita yimten tashi rakzüksang army general ya region nung lenirtem senden ka tan ita tatemlen amentsü aliba nung mezüngok.

Association of South East Asian Nations (Asean) ajanga Myanmar nungi Gen Min Aung Hlaing melen non-political representative ang ka jaoktsü molungtepa liasü.

Züngsem ter aliba bloc nung iba ama mera ya aiben magir, kong züngsem indang yimtenren nung shilem agia maru.

Myanmar nung tensa mejungi aliba tatem kati arutsü atema peria meinyak, ta Asean ajanga ashir.

August ita Gen Min Aung Hlaing-i pa ya ato kilonser ta

sangdong aser mitkar temi tashiyim amshia sorkar atsüngdokba anema nokdaker militia forces aser sepatme tsüngta raraba manenba ajanga linük nung state of emergency ya atsülangtsü, ta sangdonga liasü.

Asean ajanga sangdong ka nung ashiba agi, Hokulbarnü foreign minister tem ajungben senden ka amenba mapang October 26-28 tsüngta amentsü aliba mungdang nung Myanmar tenüng nung mitkari shilem agitsü indang onük nung ajaki molungtepa magizüktet.

Parnoki ashiba agi, Myanmar mitkar lenirtemi jembishinütsü aser tensa azüoktsü nangzükba ama meinyaktet, aser Asean nungi teshimtet nübu tem nem tepuokdak yua alila Aung San

Suu Kyi majurudaktsü, ta ashi.

Iba mungdang ya Brunei nung amungtsü lir aser pari sangdong ajanga ashiba agi, Myanmar tensa ajanga Asean indang regional security, telungjem, credibility aser centrality nung kongshir.

April ita Asean ajanga Gen Min Aung Hlaing dang linük nung azüdokshi anentsü aser political prisoner tem chiooktsü ajungshia liasü.

US Tir Joe Biden aser danga alima lenirtem adentsü aliba mungdang nung mitkar tekolakba mezüngokba ya mitkar sorkar asoshi tetsükdaktsü tulu lir.

Parnok anema nokdaker dak azüdokshiba ajemtsü aser parnok den ken o jembishinü tenzüktsü tejangraba aliba tang tashi mitkartemi mesayur.

Iba mungdang nung Myanmar tenüng nungi shilem agitsü atema Asean ajanga tenüng magütsü.

February ita mitkartemi tashiyim amshia sorkar atsüngdokba sülen Myanmar tesem ajungalen longkak ait tenzük. Iba nung telangzüba agüja mitkartemi tashiyim amshia pua merenshiba mapang nisung 1,000 dak tema tepset aser nisung 6,000 dak tema apu, ta Assistance Association for Political Prisoners ajanga ashi.

Indonesia nung ayong mürekba mapang kaketshir 11 asü

Jakarta, Mongputeni/Oct. 16

(Agencies): Indonesia indang West Java province kübok school ka nungi tanurtem ayong ka mürekba kaketshir 11 arakseta asü aser ter kumzük.

Yangji aliba ketdangsürtemi Honibarnü ashiba agi, arishi küm 13 nungi 15 tsüngta kaketshir 150 tashi Cileueur ayongkum mürekba sentong nung shilem agiba mapang parnok 21 ajuchir tzu telungi ai.

"Tzüngsang junga liasü aser yangji ajungben tzümetsüng meliasü. Arakseta asüba tanurtem ya kati ka dak teka nung soiter liasü. Ka ajuchi aser tanüngba ajak anidaka alu," ta Bandung Search and Rescue Office tekolakba Deden Ridwansyah-i ashi.

Yangji alirtem aser rescue team ajanga kaketshir ter kumzük, aser parnok ya anasa aliba mozüki kati anir ao.

Iba lendong ajururtem ajak nguogo aser parnok bushiba maparen Hokulbar aonung tembang.

Kaketshirtem ya tzu nung pongdaka ayutsü süoshi agia ter meliasü.

Parnok ya ayong ajanga aotsü merangba mapang tzu nung tsük, ta osang kar ajanga ashir, koba 'rafting' aser 'inner tubing' atema nungtugu ayong ka lir.

Tzünglu ajanga Indonesia nung mapang shia anentsüh aser ajungben tzümetsüng aludaktsür, kong nisung million aika tenem mesüra tzümetsüng adoktsüsa lenden nung alir.

Tzüngluruwa mapang ayong nung tanurtem mesenzükdaktsür, koba November ita tatemlen nungi tenzük.

Taoba küm February ita ajungben tzümetsüng agi scouts ter tashi pongzuka oa asü aser aika yirua liasü.

S Africa nung tanur nem COVID mozü agütsütsü



Cape Town, Mongputeni/Oct. 16

(Agencies): South Africa nung COVID-19 tashidak anema 'heard immunity' kumdaktsütsü mechi December ita tashinung tanur million trok aliba nungi tesaadng ka nem mozü agütsütsü sentong yanglua lir, aser October 20 nungi tenzuka tanur aser lanurtem nem mozü agütsütsü.

Arishi küm 12 aser 17 tsüngta tanurtem nem mozü agütsü tenzüktsü mapang tongogo aser renema lir, ta Health Minister Joe Phaahla-i Hokulbarnü ashi. South African Health Products Regulatory Authority ajanga Pfizer vaccine amshitsü mela lir aser iba mozü ya agütsütsü.

Ajisüaka tain rogo ama masü, tanurtem nem tang atema dose ka dang agütsütsü.

Ministerial Vaccine Advisory Committee ajanga tang atema Pfizer dose ka dang agütsütsü shia lir aser kasa mapang alima tesem balala nung dose tanabuba agir nisung kar mapang tatsüka temolungjang tezü awakaba cases aliba asadangtsü, ta ashi.

Cases kar dak temolungjang tezü tera waka arongba (inflammation) jangjateta lir.

Ibai alima tesem ajungalen asadanger, aser tang tashi dose mezüngbuba ajanga temang nung timtem tulu agütsüba mesayur, anungji tang atema dose ka dang alitsü aser maneni asadangtsü, koba agi tashidak nungi jenti kumzuka alitsü amanger, ta Phaahla-i ashi.

Osang tejangja ngutetba sülen dose tanabuba atema jembitsü, ta minister-i ashi. Ajisüaka item timtem ya teti atema masü ta tsürabur aser tanurtemi angatettsüla. Anungji iba atema jelia mera agir, ta paisa ashi.

Tang atema mozü ya school nung magütsütsü, saka küm tatem tatidang atema school-i aor nem agütsütsü kanga ajungtsü amai bilemer, ta Phaahla-i ashi.

"School tem nung tatidang tenzük asünung ibai kanga ajungtsü amai amanger, kong karbo academic year tatemleni arur aser taruba 2022 academic year atema renem tenzükogo," ta minister-i ashi.

Mozü agitsü atema tanurtemi tsürabur dang nung temelaba agitsü menüngdak, ta Acting Director General of the Department of Health, Nicholas Crisp-i ashi.

Children's' Act ajanga tanurtem arishi küm 12 nungi 17 tsüngta ano tain mükemi lir, parnok temang anepalutsü atema parnok nem temeden agütsür, ta Crisp-i ashi.

Tanurtem medical treatment atema pei tsürabur dang nungi temelaba agitsü menüngdak aser iba atema talenba tejangja agüja lir.

Pei tanurtem mozü agitsü atema tsürabur temi temelaba agütsüteter saka arishi küm 12 nungi 17 tsüngta tanurtemi tsürabur dang nungi temelaba magie mozü agiteter, ta Crisp-i ashi.

Russia nung COVID agi nisung 1000 dak tema asü

Moscow, Mongputeni/Oct. 16

(Agencies): Russia nung COVID-19 tashidak wara tenzük tang mezüngbuba iba tashidak agi anogo ka nung nisung 1,000 dak tema asü, kong mozü agiba maparen jangratema renloka maor aser tenokdangba kecha mali.

Honibarnü sorkari züngdangba nung asür nisung 1,002 aser iba tashidak agi meneper nisung tasen 33,208 liasü, koba tashidak wara tenzük asemnü atonga asüba aser cases tasen timba nung arur.

Honibarnü tashinung Russia nung shilem 31 ang COVID vaccine dose anaprong agir lir, ta Gogov website ajanga ashir.

Gogov website yagi Russia nung region balala nung COVID-19 data bendener.

Tenokdangba tesashi maliba ajanga coronavirus prokshir, aser region kar nung nüburtemi amshiba tesemi aotsü atema QR codes tanaben amshi tenzükogo.

Linük nung vaccine agiba jenjang kanga ajema liaka Kremlin-i tenokdangba tesashi tanaben benoktsü memolunger aser rongsenketzung nung timtem majurudaktsütsü meranger, ta hopta tetenzüklen ketdangsürtemi ashi.

Shiranger timba akumba anepalutsü atema Russia indang medical system renema lir, ta ashir.

COVID-19 tashidak tali akumba atema ketdangsürtemi Russia nung tenüng asener.

Hopta tetenzüklen Health Minister Mikhail Murashko-i parnok yimya meshidak, ta aitsü aser Kremlin odongtar Dmitry Peskov-i, pei takum kumzüktsü atema mozü agitsü maongka agüja teinyaktsü ajak inyakogo, ta ashi.

Iba linük nung yanglutetba mozü ya ita aika amshia arur, saka ketdangsürtemi temolung süa mozü magütsüteter.

Russia nung tesaadng dak tali iba mozü agitsü sentong mali, ta asadangteta lir.

Tang Russia nung COVID agi asür nisung 222,315 lir, koba Europe nung timtiba alitsü.



Noakhali nung aliba ISKCON temple telung nung motorcycle aser ki-osek aika mi agi rongdoker liasü. Noakhali, Bangladesh nung aliba ISKCON temple amaker ya nisung 500 shi liasü aser parnoki putir aser tekülemer zuka merenshi, ta tenük kuli alirtemi ashi.

Actress Farrukh Jafar alima nungi pilaogo



Farrukh Jafar (File photo)

New Delhi, Mongputeni/October 16, 2021 (Agencies): Actress tejen, Farrukh Jafar, shibai film talisa "Gulabo Sitabo" aser "Sultan" nung shilem agiogo, Hokolbar nikongdang Lucknow kübok mozüki ka nung la süogo. La arishi kum 89 liasü.

Tan ita tetenzüklen, Jafar'er jala tantsüla Mehru Jafar-i ashiba agi, kütsü temang manem lir aser Sahara Hospital nung la anepaludar.

"Tango junga meshashitetba ajanga October 04, 2021 nü pa mozüki anir ao. La temang kanga mejungi liasü. La nem oxygen agüja yariba mapang, la tepokpok agi mapa junga meinyak. Nikongdang 6:00 ako meta la iba akümüli nungi pila oadok," ta Mehru-i ashi.

Jafar'er semchir Shaaz Ahmad-ia Twitter nung tetsü (grandmother) asüba osang lemsatepa liasü.

"Otsüla aser nüjiso atema rarar, Ex MLC S. M. Jafar kinungtsü aser Actress tejen Farrukh Jafar Lucknow nung Hokolbar nikongdang süogo," ta

Shaaz-i lemsatep.

Honibar anepdang la den asüpila sentep sentong agiogo, ta Shaaz-i ashi.

Jafar, shiba 1963 kum Vividh Bharti Lucknow indang mezüing radio announcer ka liasü, lai 1981 kum industry nung ajemoka classic "Umrao Jaan" nung mezüing shilem agi. Iba indang tetsü shilem agiogo.

Iba sülen, lai TV show kar nung shilem agia liasü, saka 2004 kum Shah Rukh Khan indang "Swades" nung lai shilem agiba ajanga alimai la tali jangjaa aküm.

Jafar-isa Aamir Khan indang "Peepli Live" nung lai moko achir ka ama shilem agiogo aser Salman Khan indang "Sultan" nunga lai tongti shilem agia liasü. "Photograph" nunga lai Nawazuddin Siddiqui tetsü (grandmother) ama shilem agiogo.

Ajisüaka, "Gulabo Sitabo" nung lai megastar Amitabh Bachchan character indang kinungtsü - Fatima Begum ama shilem agiba ajanga industry

nung ajaki sapuba actress rongnung la ka aküm. Gulabo Sitabo ya Shoojit Sircar-i direct süa liasü. Iba film nung takok ngua shilem agiba den nüburtemi la character (Fatima Begum) jangratema agizükba atema lai pelaba lemsatepa liasü.

"Iba film nung nüburtemi Begum shilem tzuratema agizükba osang angashiogo. Nüburtemi iba film temolung ajak agi jangratema agizükba atema pelaba lemsateper," ta 2020 kum interview ka agiba mapang Jafar-i ashi.

Iba film nung Jafar-i arishi kum 95 tain ka ama Bachchan indang arishi kum 78 tain character Mirza kinungtsü shilem agir. Otsü nung, Fatima Mahal agitsü atema Mirza-i Begum asütsü yongyaba sayur. Iba film nung Ayushmann Khurana aser Vijay Raaz nati tongti shilem agiogo.

Screenwriter Juhi Chaturvedi, shibai "Gulabo Sitabo" script zülua liasü, lai Jafar nem akhüm agüja liasü.

"Begum, iba akümüli nungi pilaogo, na ama shinga mangutsü. Nü den longjemer project ka nung külemi inyaksü maongka anguba atema pelar. Allah kabuma nung na kumzüka lir ta amanger. #FarrukhJaffar #Begum #FattoBi #FatimaBegum #GulaboSitabo na tesünap nung anisüngzükangma," ta Instagram sabang nung Jafar noksa ka den külemi Juhi-i iba olen lemsatep.

Jafar ya journalist-politician Syed Muhammad Jaffar den kibong aküm aser lai jala ana Mehru aser Shaheen na toktür süogo.

Rana Daggubati aser Milind Rau na longjemtsü

New Delhi, Mongputeni/October 16, 2021 (Agencies): Project tasen ka atema, South star Rana Daggubati-i director Milind Rau den longjemtsü sentong renemdar, ta film yanglurtemi sangdong ajanga metetdaksü.

Rau, shibai Tamil film tem talisa "Netrikann" aser "The House Next Door" tem direct süogo, pai project tasenba atema nungja ka agüja mali. Twitter nung Production company Viswasanti Pictures ajanga iba osang lemsatepa liasü.

#Bhallaladeva @RanaDaggubati-i @milindrau indang otsü tasen ka nung shilem agitsü, koba SpiritMedia den @VISWASANTIPICTS

& @VCWOfficial longjemer iba project yanglutsü. Iba Pan-India #Film ya #Telugu #Tamil aser #Hindi nung yanglutsü terenemba lir. @GopinathAchant, CH. Rambabu & @arjundasyan nungeri iba film produce asütsü," ta Twitter nung shia lir.

Arishi kum 36 tain Rana-ia Twitter ajanga iba osang lemsatepa liasü.

Iba movie dak alia, Daggubati-i actor tejen aser pa teko Venkatesh Daggubati den "Rana Naidu" nung külemi shilem agiba angutsü. Iba film ya nungtugu American TV series "Ray Donovan" nung ajemdaker yanglutsü, koba Netflix ajanga sayuogo. October 14, 2021 nü 'Rana

Naidu' film tangoktsü tenzük. Locomotive Global Media indang Sunder Aaron ajanga produce asütsü aliba Telugu web series ya Bollywood aser Mumbai nung nungtugu nisung indang 'professional fixer' ka otsü asütsü.

Iba project (Rana Naidu) atema, Rana-i Instagram nung poster ka den iba osang lemsatepa liasü.

"VICTORY V @venkateshdaggubati den külemi project nung inyaknüa liasü aser tanga kü mangdang asangsang nung ataloker. "Rana Naidu" nung pa den külemi shilem agitsü asoshi yongyasete. Netflix ajanga #RanaNaidu yakta sayatsü," ta pai lemsatep.

Mel Gibson-i 'Hot Seat' nung shilem agitsü

Mongputeni/October 16, 2021 (Agencies): Taruba thriller movie, 'Hot Seat' nung Hollywood actor, Mel Gibson-i tongti shilem agitsü. Sangdong ajanga angazükba agi, arishi kum 65 tain Gibson-i shilem agiba den külemi, pai iba feature film produce asütsü aser James Cullen Bressack-i anir iba

project yanglutsü. 'Hot Seat' ya 'ex-hacker' ka indang otsü asütsü, kong mejangjaba nisung kati pa (hacker) inyakba office menden nung bomb ka yutsür aser high-level banking institution tem 'hack' asütsü mesüra bomb ji pokdaksütsü amokmerener. Gibson-i iba hacker taküm

kumzüksü mechi pai teyariteper ka ama shilem agitsü. Iba film ya Leon Langford aser Collin Watts nati züluba otsü ka nung ajemdaker yanglutsü.

'Hot Seat' ya Bressack den Randall Emmett aser George Furla na longjemer produce asütsü.

MULUNG NEN O



ASO
30-01-1973

ASÜ
05-10-2021

Ozü mulungjang nungi kodanga amadoktsü makokba temeim kinungbo aser tebuti Asür Limaaküm Longkumer, Pa shirang yipden nung alidang nungi akümüli tembangba anogo tashi nung ozü den kija, kibong aser lokti balala shirnokisa sarasadem, nübu, shisatsü aser rongsen agi yaritepba temeim mapang sayuogo, nenok ajak dang pelaba lemsateper.

Nenok mapa tajung onok mulung nung teti alitsü. Tsüngremi nenok ajak moajangma.

- Temeim Kinungtsü, jala, jabsa Aser Kinungertem

OFFICE OF THE AOYIM VILLAGE COUNCIL

AOYIM : DIMAPUR

Gove. Regd. No. GAB-13/17/83 (Vol-IV) 8th Jan.'92

Ref. No.....

Date 16.10.21

METETDAKTSÜR

Aoyim Village Council aser Aoyim Village Senso Telongjem ajanga telemtetba aser rongdak teinyaksü mapa ka yamai metetdaksür. 15th Buba Aoyim Village Senso Mungdang nung lemtetba ama, maneni Aoyim merakteta aser yim mapa balala kecha teimtem makai inyaksangshitetsü mechi, maneni yimertem ajaki pei kimong temaket merakteta ayutsü aser pei li/kimong nung plantation yoka lira, yim li/lemang anasa alibatem ajak December 2021 ita tashi nung merakteta indoktsü, maneni iba zulu ajanga metetdaksür. Mapang lateta yutsüba anogo tashi nung sangdongba ama meinyakra, Yimteni tapet mapa inyaksü.

Sd/- (TOSHIMEREN)

Sd/- (K. TEMSU JAMIR)

Secretary

Chairman

Aoyim Village Council

Aoyim Village Council

37 BUBA DIMAPUR DISTRICT AO PENSIONERS' TELONGJEM KÜM TATEM LOKTI SENDEN SENDONG

Anogo : 22nd October 2021

Mapang : 10:00 am nungi

Tesentepdak : Mr. & Mrs. Lepzuk Jamir

DDAPT Kimen, Kevijau colony

Dimapur Near Livingstone School Dimapur

- Menden : Ketdangpurtem
- Sarasademtsü : Er. Imti, Duncan
- Tesenteper pelaa agizükba aser Tasür bilemtetba: President
- Ni ya shinur : Mrs. Arenla Imsong
- Osangtem agitsü : (1) Audit Osang
(2) Nominating Committee osang
(3) General Secretary osang

6. O lemtetpa mapang :

7. Tatem sarasadem : Telok

Temetetsü O:

- Meeting temer lokti chiyongba mapang altisü.
- Kum tatem lokti senden sendong malemer, saka Tir Yimyim aser Nagaland Post nung adoktsütsü. Anungji ajaki mejashi-i mapang shitak nung meeting-i arudaksünur.
- Government tetuyuba nung ajemdaker SOP shitak amshia senden altisü.
- Iba sendong asoshi ajaki sarasadema atadi.

Jayasurya-i best actor award angu

New Delhi, Mongputeni/October 16, 2021 (Agencies): Malayalam actor

Jayasurya, shibai tesüiba anogo agiba film 100buba sayaba mapang alizüing tasen ka tongtet, Honibarnü, 51buba Kerala State Film Awards nung pai Best Actor award nguogo.

Iba sentong nung jury rongnung nungtugu actress

Suhashini tekolak liasü aser State indang Minister for Films and Fisheries, Saji Cherian-i sentong nung takok angur tenüngtem sangdonga liasü.

'Vellam' film atema Jayasurya-i best actor award agizük. Kasa sentong nung, arishi kum 26 tain Anna Ben-i 'Kappela' film nung shilem tajung agiba atema 'Best Actress award' angu.

FIFA, ANTA aser A Yhome nungeri kokogo 21BUBA NSF MARTYRS MEMORIAL TROPHY:



Kohima, Mongputeni/October 16, 2021: 21buba NSF Martyrs' Memorial asayamung nung, FIFA FC aser Panther FC na asayaba mapang tangokba noksa ka yangi angur.

Kohima, Mongputeni/October 16, 2021 (TYO): Honibarnü, Indira Gandhi Stadium kübok 21buba NSF Martyrs' Memorial asayamung nung FIFA Football Club, All Nagaland Taxi Association, ANTA aser A Yhome Football Club nungeri pei pei tata asaya kokogo.

Mezüng match nung, FIFA FC aser Panther FC na asaya liasü, kong FIFA puri Panther FC madak goal 4 agi takok angu. Iba asaya nung, FIFA FC atema Rihesh-i goal ana aser

Ngoulal o Benjohnson nati goal ka ka inoktsü.

Tanabuba match nung, Team ANTA aser Patron FC na asaya liasü. Team ana tsüingda kanga toktepa asaya. Ajisiaka, asaya atema latetja aliba mapang tashi team anapronglai goal ka danga meinoktsütetti draw nung tembangba sülen, tie-breaker ajanga ANTA-i Patron FC madak goal 5-4 agi takok angu.


Maneni, kasa asayamung match tasembuba nung, A. Yhome FC aser Youngsters FC

na asayaago. Iba asaya nung A. Yhome FC-i Youngsters FC madak goal 4-0 agi takok angu. Yhome FC atema Avilie Tsükri-i goal ana aser Keneiguze Pienyü o Villhoubeituo Yhome nati goal ka ka bendenloksü.

- * **Hombar (18.10.2021) atema asaya yamai alitsü:**
- 1. Ansem FC Vs United Brothers FC @ 11:30 AM
- 2. Phesama Y.O Vs Hooligans FC @ 1:00 PM
- 3. Chandmari HSS Alumni Vs Magdaline coaching FC @ 2:30 PM

T20 World Cup sülen Rahul Dravid-i India Head Coach inyaktsü

New Delhi, Mongputeni/October 16, 2021 (Agencies): Taoba mapang India cricket team captain, Rahul Dravid-i Head Coach ama Ravi Shastri melenzüktsü terenemba lir.



Rahul Dravid (File Photo)

T20 World Cup, koba October 17, 2021 nungi tenzüka asayatsü, iba asayamung temer sülen, küm ana atema Dravid-i Head Coach mapa inyaktsü contract agizüktsü akok.

October 24, 2021 nü India indang campaign tenzüka parnoki Pakistan den mezüng asayatsü aser iba asayamung final ya November 14, 2021 nü asayatsü renema lir.

Board of Control for Cricket in India (BCCI) president Sourav Ganguly, shibai international level nung mapang talangka team nung Dravid den külemi asaya aser team captain inyaka liasü, pa aser secretary Jay Shah nati iba maparen atema Dravid den sensaksema liasü aser Dravid-i küm ana contract nung iba mapa inyaktsü mulongogo, ta sangdong ajanga metetdaksü.

Maneni, taoba mapang fast bowler Paras Mhambrey-i Bharat Arun melena India indang bowling coach aser Vikram Rathour-i maneni India team indang batting coach ama

inyaktsü.

Taoba mapang, India captain, Virat Kohli-i ashiba agi, aruya aliba asayamung (T20 World Cup) temer sülen, India T20 team indang captain mapa toktsütsü.

Dravid-i India A aser Under-19 team indang coach inyakogo; aser pa tawabangba kübok 2018 küm India U-19 team-i U-19 World Cup title takok angu. 2019 küm nungi Dravid-i National Cricket Academy (NCA) nung tekolak ka ama inyaka arudar aser taküm küm tetenzüklen Sri Lanka den limited over tour nung Shikhar Dhawan captain ser asayaba mapang Dravid-i team indang head coach inyaka liasü.

Indian Wells: Azarenka aser Badosa na final asayatsü



Azarenka

Badosa

Indian Wells, Mongputeni/October 16, 2021 (Agencies): Victoria Azarenka, shibai Indian Wells asayamung nung WTA title asem takok angur tetsür rongnung mezüng akümtsü asoshi meranga asayadar, tetsür kija semifinal asaya nung lai 3-6, 6-3, 7-5 agi taoba mapang French Open champion Jelena Ostapenko tsükdaktsüba sülen, iba asayamung final tongtetogo.

Australian Open anaben tashi takok angur Azarenka-i 2021 season indang mezüng takok angutsü aser iba den külemi California nung asaya 22buba takok angutsü nükjidong yur shilem agidar.

Tetsür kija semi final asaya mezüng set nung Azarenka-i Ostapenko makokba sülen, arishi küm 32 tain Azarenka-i tanüingba set anaprongla atonga takok angu.

2012 aser 2016 küm takok anguba sülen, Azarenka-i iba asayamung tasembubaba takok angutsü meranga asayadar. Azarenka-i tan Indian Wells

asayamung takok ngura, lai taoba mapang iba asayamung anaben takok ngua alir asayar talisa Martina Navratilova, Serena Williams aser Maria Sharapova nunger record ajangtetsü.

Semifinal asaya tatemlen Ostapenko-i net nung ball zükloksüba ajanga Azarenka-i mezüng match point nung takok angu.

Ostapenko-i mezüng set shilem timbaka amokbanger asaya, kong game tanabuba nung 2-0 agi Azarenka tejakdang kümadok. Iba sülen, serve nung la 3-0 tashi tua Azarenka nem maongka magütsü asaya.

Tanabuba set nunga Azarenka 0-2 agi Ostapenko tesülen ser asaya tenzük, saka game tasembuba nung lai Ostapenko ajateta asayatsü maongka angu. Iba mapang, Azarenka-i game pungo tashi atonga takok ngua point 5-2 agi Ostapenko tejakdang kümadok. Ostapenko-i serve ka yoktsü maongka angu, saka Azarenka-i iba asaya takok angu.

Set tasembuba nung asayar anaprongla kanga toktepa asaya, kong Azarenka-i game timba akoktsü maongka angu aser lai game asem tashi atonga takok ngua final tongtet.

Iba asayamung tetsür kija final nung, Azarenka-i Spain tsür Paula Badosa den asayatsü. Kasa asayamung Tennis Garden arena kübok semifinal tanabuba asaya tanga ka nung, Paula-i Tunisia tsür Ons Jabeur tsükdaktsü.

Maneni, kasa asayamung tebur kija quarter final asaya nung, Olympic champion Alexander Zverev aser French Open runner-up Stefanos Tsitsipas naprongla tsükogo.

Zverev, shibai tan season indang ATP Masters 1000 title tasembuba takok angutsü asoshi meranga asaya liasü, quarter final nung pai 4-6 6-3 7-6(3) agi Taylor Fritz makok.

Quarter final asaya tanga ka nung, Georgia nunger Nikoloz Basilashvili-i 6-4 2-6 6-4 agi world no. 3 Stefanos Tsitsipas tsükdaktsü. Nikoloz-i tan asayamung nung mezüng Masters 1000 semi-final tongteter asütsü.

Deobarnü, Nikoloz Basilashvili-i Taylor Fritz den semi-finals asayatsü. Kasa anogo tebur kija mezüng semifinal nung, world no 21 Cameron Norrie aser world no. 23 Grigor Dimitrov na asayatsü. Round of 16 nung Grigor-i top-seed Daniil Medvedev tsükdaktsü.

Kremlin Cup nung Raducanu masayatsü

Mongputeni/October 16, 2021 (Agencies): Tang asaya aliba Indian Wells asayamung tanabuba round nung tamakok anguba sülen, U.S. Open takok angur, Emma Raducanu-i Kremlin Cup nung masayatsü, ta sangdong ka ajanga metetdaksü.

Kremlin Cup asayamung ya taruba hopta Moscow nung tenzüktsü sentong lir. Emma-i aruya aliba tennis asayamung nungi tukadokba dak sendakba nung kuli tejangja ka agüja mali.

"Tia makai, asayamung schedule melenshitsüsa akümer aser taküm Moscow (Kremlin Open) nung masayatetsü, saka sangküm

Russia fans matsüingdang iba asayamung nung shilem agitsü imlaa atar," ta Emma-i ashi.

Taoba hopta, Indian Wells asayamung tetsür kija asaya mezüng round nung, arishi küm 18 tain Britain tsür Raducanu-i Belarus tsür Aliaksandra Sasnovich makok. Flushing Meadows kübok U.S. Open title takok ngur sülen, Emma-i iba asayamung nung mezüng shilem agia liasü.

World no. 22 Emma-i ashiba agi, Sasnovich makokba (Indian Wells) ajanga kanga dang tezütanga liasü, saka tajungtiba asayatsü asoshi mapang agia anisüngzüktsü nüngdaker.



Noklak, Mongputeni/October 16, 2021: 'Fit India Movement & Khelo India' mapatong kübok Honibarnü, Noklak nung Assam Rifles-i Khamniungan lanurtem den friendly volleyball match ka ayonga asayaba mapang tangokba noksa ka yangi angur.

BILEMDANGANG

"Tsüngremi agütsüba sempetji Pa dang asüngdanga amshi tajungba."